

## Vegen vidare for Hordaland Ungdomslag

Hordaland Ungdomslag (HU) er fylkeslag for 40 lokallag i Noregs Ungdomslag. Fylkeslaget skal vere eit bindeledd mellom lokallag og NU sentralt, og bidra til informasjonsflyt og auka aktivitet i lokallaga. Dei siste åra har det vore lite kontakt mellom fylkeslaget og lokallaga, og på årsmøtet i HU i 2022 var det framlegg frå det dåverande styret om å legge ned fylkeslaget. Dette blei ikkje vedtatt, og årsmøtet valde i staden eit nytt styre, som har hatt som hovudoppgåve å sjå på framtida til HU. Me har kartlagt arbeidsoppgåvene til HU, hatt kontakt med NU sentralt og fått innspel frå lokallag. I tillegg har me henta inspirasjon hos fylkeslag i NU som fungerer godt og hos fylkeslaga i andre nærliggande organisasjoner.

Styret i HU var tidleg i kontakt med NU sentralt. Me hadde eit møte for å diskutere konsekvensane av ei eventuell nedlegging. Mange lokallag i HU forheld seg allereie i dag mest til NU sentralt, der ein kan få raske svar. Frå NU si side var det ønskeleg med eit fylkeslag, både fordi fylkeslaget kan ha tettare kontakt med kvart enkelt lokallag enn sentralleddet har kapasitet til, og fordi det er nyttig både for sentralleddet og lokallaga med eit mellomledd.

Som fylkeslag famnar Hordaland Ungdomslag om fleire kommunar og kan difor søke om stønad frå fylkesleddet i forvaltninga. Dersom ein ikkje har eit fylkeslag, vil det vere vanskeleg å söke på midlar tiltenkt ein større region. Dermed vil lokallag gå glipp av stønad dersom ein vel å legge ned HU.

Hordaland Ungdomslag har tidlegare stått for arrangement som barnestemne, instruktørkurs og ulike andre samlingar. Utan eit koordinerande fylkesledd, vil denne typen arrangement avhenge av initiativ frå lokallag, og ein kan risikere at kontinuiteten i arbeidet forsvinn, slik at det blir meir eller mindre tilfeldig om det blir t.d. barnestemne eit år.

Hordaland Ungdomslag representerer lokallaga og medlemmene i fleire ulike organ (sjå årsmeldinga for ei fullstendig oversikt). Å legga ned fylkeslaget vil derfor medføra at ein mister viktige moglegheiter til å påverka ulike prosessar.

Styret i Hordaland Ungdomslag er opptekne av at fylkeslaget er bygd opp nedanfrå - av lokallag. Dersom det skal vere eit fylkeslag i Hordaland, må det vere etter ønske frå lokallaga. Innhaldet i eit eventuelt fylkeslag må vere tilpassa lokallaga sine behov. For å finne ut korleis Hu best kan støtte opp om lokalt arbeid, kalla me inn til lokallagssamlingar. På møta tok me imot innspel frå lokallaga og diskuterte fordelar og ulemper med fire konkrete modellar for vidare arbeid:

- Nedlegging
- Minste minimum fylkeslag - definert av NU sine minstekrav til fylkelag
- Maksimum fylkeslag - eit fylkeslag som vidareformidlar informasjon, bidreg til nettverk og tilbyr kurs for instruktørar, tillitsvalde og medlemmar. Kan evt. gjerast med ein tilsett.
- Samarbeid med Sogn og Fjordane Ungdomslag om tilsettressurs - Ønske frå Sogn og Fjordane for å utvide stillinga på 50 % som dei allereie har i dag

Sogn og Fjordane Ungdomslag ønsker ikkje å slå seg saman med Hordaland Ungdomslag. Difor har ein ikkje arbeidd vidare med samanslåing til Vestland Ungdomslag.

Innspelsmøte hausten 2022		
Stad	Dag	Lokallag (tal møtte frå lokallaget)
Jondal	22.september	Avlyst
Voss	26.september	Voss Ungdomslag (5), Ulvik Ungdomslag (1)
Lindås	4. oktober	Kløvheim ungdomslag (2), ungdomslaget Framsteg Rossland (1), Lindås ungdomslag (4)
Bergen	20.oktober	Bergen ul Ervingen (2), ein frittståande deltakar
Valestrand	27.oktober	Valestrand Ungdomslag (1), Nordbygda Ungdomslag (2), Mjeldalen Ungdomslag (2)
Digitalt	01.november	Generalsekretær i NU

Alle lokallag har i tillegg hatt mogleheit til å sende inn innspel. I tillegg har me hatt telefonkontakt med fleire lag.

På alle dei fire møta kom det fram at ein ønsker å behalde Hordaland Ungdomslag. Ein ser potensial i organisasjonen. HU kan dele informasjon og kunnskap mellom lokallag. Ein kan utvleke kunnskap i nettverk for folkedans, teater, ungdomsklubb, ungdomshus osv. I tillegg kan fylkeslag organisere kurs for tillitsvalde, instruktørar og øvrige medlemmar. Her er det særleg kurs innan organisasjonsarbeid som vert nemnt, t.d. økonomi og søknadsskriving. I tillegg har Fylkesstemne for born vore nemnt som eit bra arrangement som bør halde fram. Innspela frå alle møta er at det er behov for ein regional paraply, og at ein difor bør gå for eit *maksimum* fylkeslag, gjerne med tilsettressurs.

Innspela styret har fått, både på møta og i telefonamtalar med ulike lokallag, gjev altså eit tydeleg signal om at mange av laga som hører til HU, ønsker seg eit fylkeslag. Det er òg stor einighet om at det beste ville vere om fylkeslaget kunne vere aktivt og tilby både kurs, nettverkssamlingar og andre former for støtte til lokallaga ut over minimumsfunksjonane eit fylkeslag skal ha. Basert på desse innspela, meiner styret i HU at nedlegging ikkje er eit alternativ.

Når det gjeld dei andre alternativa som er skisserte og diskuterte på møta rundt om i fylket, ser styret for seg at det vil vera nødvendig å trappe opp aktiviteten gradvis dersom ein vil ha eit aktivt fylkeslag (maksimum/med tilsett). Eit årsmøte kan ikkje vedta engasjement, og for at fylkeslaget skal kunne fungere, er me avhengige av at lokallaga engasjerer seg og bidreg. Me ser for oss at det vil vere lettare å rekruttere tillitsvalde til eit nytt styre dersom ein kan få ein litt mjuk start. Både det nåverande styret og mange av laga me har snakka med, har stor tru på at engasjement avlar engasjement, og håpet er at dersom ein kjem litt i gang med større aktivitet, vil det gje meirsmak og gjere at fleire ser nytta av fylkeslaget og får lyst til å engasjere seg. Styret har derfor utarbeidd eit forslag til plan for opptrapping. Denne planen er tenkt som noko styret dei kommande åra kan ta utgangspunkt i og endre undervegs, basert på erfaringane ein gjer seg. Det vil vere vanskeleg å binde framtidige styre til så

konkrete planar, så me har ikkje tenkt at denne planen skal vedtakast som eit arbeidsprogram.

**Framlegg til vedtak: Årsmøtet vedtar å ikkje legge ned Hordaland Ungdomslag. Årsmøtet ber styret om å trappe opp aktiviteten i Hordaland Ungdomslag gradvis.**

### **Mogleg opptrappingsplan:**

<b>Mogleg opptrappingsplan</b>			
Dato	Arrangement	Stad	Innhald
19. mars 2023	Årsmøte + miniseminar	Åsane	
Mai 2023	Ringerunde til lokallag		Korleis går det? Invitasjon til kurs i sept.
Sept. 2023	Organisasjonskurs + hussamling	Osterøy	Økonomi og søknadsskriving
Mars 2024	Årsmøte	Voss	
Juni 2024	Barnestemne		
Juni 2024	Leiarsamling	Saman med barnestemne	Skape nettverk, drøfte problemstillingar leiarane kjem med
Sept. 2024	Organisasjonskurs	Jondal	Hus - vedlikehald, økonomi
Nov. 2024	Ringerunde til lokallag		Korleis går det? Invitasjon til årsmøte i mars.
Mars 2025	Årsmøte	Lindås	
Juni 2025	Barnestemne		
Juni 2025	Aktivitetssamling	Ulvik	Skape nettverk, utveksle idear,
Sept. 2025	Teknikkurs	Bergen	Opplæring i bruk av lyd/lys/digitale verktøy
Nov. 2025	Ringerunde til lokallag		Korleis går det? Har de barn å sende til barnestemne?

<b>Mars 2026</b>	<b>Årsmøte</b>	<b>Austrheim</b>	
<b>Juni 2026</b>	<b>Barnestemne</b>		
<b>Juni 2026</b>	<b>Leiarsamling</b>	<b>Askøy</b>	<b>Skape nettverk, drøfte problemstillingar leiarane kjem med</b>
<b>Sept. 2026</b>	<b>Organisasjonskurs for unge vaksne</b>	<b>Voss</b>	<b>Opplæring i styrearbeid, skape nettverk</b>
<b>Nov. 2026</b>	<b>Ringerunde til lokallag</b>		<b>Korleis går det? Ønske om kurs til neste år? Invitasjon til barnestemne/årsmøte.</b>